

Entiteti i država moraju raditi zajedno



Kontinuirana opredijeljenost i fokusiranost međunarodne zajednice na Bosnu i Hercegovinu je put ka ostvarenju cilja, a to je sigurna i stabilna država koja sama može riješiti svoje probleme institucionalnim putem i ostvariti punu integraciju u evroatlantske strukture, izjavio je danas visoki predstavnik Valentin Inzko u svome obraćanju Vijeću sigurnosti UN-a.

Visoki predstavnik je prezentirao svoj šesti polugodišnji izvještaj Vijeću sigurnosti, odnosno četrdeseti izvještaj ukupno od uspostavljanja OHR-a.

On je rekao da bosanskohercegovački političari i dalje pokazuju malo spremnosti na kompromis i izbjegavaju dijalog o ključnim pitanjima. Lideri su također zloupotrijebili politički sistem i provocirali jedni druge putem medija. Krajnji rezultat takve situacije je blokiranje procesa evroatlantskih integracija i šteta koja je učinjena ekonomiji zemlje.

Visoki predstavnik naveo je primjere opasne neodgovornosti u oba entiteta te među strankama koje predstavljaju sva tri konstitutivna naroda.

„Želim izraziti duboku zabrinutost zbog nedavnih izjava koje dovode u pitanje državnost BiH time što zemlju karakteriziraju kao ‘državnu zajednicu’, ingorirajući činjenicu da je BiH primljena u punopravno članstvo u Ujedinjene narode 22. maja

1992. godine, zajedno sa Slovenijom i Hrvatskom," dodao je Inzko i istovremeno ukazao na zapaljivu retoriku koju koriste određeni političari.

U tom kontekstu, visoki predstavnik je istaknuo da nije bilo napretka u ispunjenju pet ciljeva i dva uslova za zatvaranje OHR-a.

On je naglasio da politički lideri moraju shvatiti „da će entiteti i država biti jaki samo kada su oba nivoa vlasti jaka – oba nivoa će postajati sve jači samo kada budu radili zajedno i kada država dobije podršku koja joj je potrebna da bude efikasna.“

Govoreći o još uvijek izraženoj potrebi da se održi izvršni mandat EUFOR-a i OHR-a, visoki predstavnik je zaključio da je „naša kontinuirana opredijeljenost i fokusiranost na Bosnu i Hercegovinu put ka ostvarenju cilja koji svi želimo dostići, a to je Bosna i Hercegovina kao stabilna i sigurna država koja sama može riješiti svoje probleme institucionalnim putem dok se kreće ka punoj integraciji u evroatlantske strukture“.

Tekst obraćanja visokog predstavnika dostupan je u cijelosti na [sljedećem linku](#). (photo: UN Photo by Devra Berkowitz)